

Hechonan historico:

Na aña 1816 tabata tin na Aruba apenas 1732 habitante

ORANJESTAD (AAN): E siguiente articulo ta trata un tiki di Historia di Aruba pa lectornan di DIARIO.

"Dia 27 di Januari 1816, e Comandante nobo di Aruba a yega Curacao den compania di Albert Kikkert, Gouverneur-general, abordo di e barco "Prins van Oranje".

Ta trata di Ludewich Chrisoph Boye. Ta na Kikkert e Inglesnan a bolbe entrega e colonia Curacao y su dependencia (Aruba y Bonaire).

Kikkert di biaha a nombra un comision pa viaha pa Aruba y tuma e isla back for di e inglesnan.

E Comision tabata consisti di H.W. de Quartel, Comandante di e schoener "De Haay", cu a bin Curacao acompañaando "Prins van Oranje", J.F.G. Ziegler, comerciantenan y Frans Royer agricultor.

Aruba tabata prome na turno pa pasa di e Inglesnan back den su posesion.



E Comision tabata kier sa, entre otro, e nomber di e doñonan di tereno, si Aruba ta dividi den Distrito, cuanto comerciante, agricultor y pro-

fesional tin na Aruba, con ta para cu Religion, cuanto cas tin na e isla, ki clase di bestia ta ser cria.

Tambe con agricultura ta

bayendo, cuanto hende tin ta biba ey, cuanto barco ta yega y zarpa di e isla, con ta bayendo cu salud publico y otro asuntunan cu mester ta al tanto di nan.

Relaciona cu e lista aki di pregunta, y pa amplia e informacionnan cu nan tabata tin mester, e Comision a dirigi un carta na e representantenan di e habitantenan di Aruba, dia 11 di Maart 1816.

Den e carta, e Comision ta puntra con e habitantenan ta para cu e asunto di awa.

Esaki ta bin di yubia, of tin fuentenan natural? Con e tera ta, fertil of demasiado seco pa agricultura?

Ki clase di clima tin? E Comision tambe tabata kier sa tur cos tocante e existencia di mineralnan, mondinan, agricultura y cria di bestia, y cuanto cabay y mula ta ser cria pa exportacion.

Alavez e Comision kier a sa si burico tabata ser cria sistematicamente na Aruba, y con ta para cu e carnenan, y si ta haciendo probecho total di lana.

Ademas, ta con por drecha e raza di carnenan cu tabata tin na Aruba.

Na nomber di e Comision a firma e siguiente personanan:

"Van der Biest, H. Eman, L. Croes, y S. Prince.

Aki atrobe por mira apeyi-

donan bon conoci na Aruba y tabata pertenece na stamvaderman di e famianan posterior di Aruba cu tin e mesun apeyido.

E contesta riba e preguntanan anterior cu e Comision a haci ta para den e Rapport 1816, cu a ser publica pa Dr. J. de Hullu na cuminsamento di añanan mil nuebecien.

Di e total di habitantenan ey, 1106 tabata Catolico Roman di religion, 279 tabata reforma, 11 Luterano y 19 Judío.

Pa loke ta trata e profesionnan, na aña 1816 tabata tin na Aruba: 194 tabata agricultor, 78 marino, 9 piscador, 8 zapatero, 16 den comercio, 2 goudsmeed y 1 sastre.

Aruba no tabata dividi der distritonan, y segun e Rapport a laga sa, esey no tabata necesario tampoco.

Claro cu no, pasobra si e total di habitantenan tabata monta na apenas 1732 alma ta con e tabata bay dividi nan den diferente distrito? Cu un tabata basta.

Den su raport el a describi Aruba como un isla cu algun cerro, entre cualnan el a menciona Jamanota y Hooiberg.

E tereno, el a bisa, no tabata fertil. Na Fontein tabata tin un fuente di awa, cual e tabata supone ta filtra for di e ceronan.

Hasta den e añanan mas seco, semper e fuente a sigui duna awa.

Ey tabata tin un cas di ruiter y un baki, pero den mal condicion.

Tabata permiti un persona biba den e cas y traha e tera, pero pa haci esey e mester dreña den un contrato cu e Comandante, kende durante añanan largo a controla e cas y e fuente.

Fuera di Fontein, e Rapport a informa cu no tabata tin otro fuente di awa natural.

E diferente damnan tabata provee e criadornan di baca y otro tipo di bestia cu nan necesidadnan di awa cu nan ta haya di yubia, segun e Rapport a sigui bisa."

Relato for di e Buki: HISTORIA DI ARUBA. Escritor y Historiador: Sr. Jossy M. Mansur.